

Bataga hinkantoo kañ Pol n'a sanba Korent borey se

Citaaboo fahamandiroo

Pol bataga hinkantoo ti woo kañ a g'a hantum Korent borey se. Korent borey sintin ka naanay dargantey kañ ga ceeci k'i bere. I ga nee kañ Irkoy mana Pol donto, man'ti diyaw no. Woo hanse ka Pol dor, woo se a na bataga hinkantoo woo hantum i se. A bay ka šenniyāñ har i se kañ n'i dor, amma Pol bayrandi kañ ngi doraa kan nga se, zama nga šenney n'i bere hala i ma hanga fonda.

Pol ga nga diyawtaraa cebe, amma man'ti maa no a ga ceeci. A si baa kala borey ma yadda Alhabar Boryaa ga kañ a g'a har, i ma naanay Isa Almasihu sanda ngi Koyoo nda ngi Hallasikaa.

Borey kañ se batagaa sanbandi maajney

nda fooyanoo kañ teendi i se

¹ Agay Pol kañ ti Almasihu Isa diyaw Irkoy ibaayoo ra, nda ir armaa Timote ka batagaa woo sanba Irkoy Egilizoo se kañ goo Korent koyraa ra nda Irkoy boro henanantey kul kañ goo Akay gandaa kul ra.

² Ir Baaba Irkoy nda ir Koyoo Isa Almasihu anneemaa nda alaafiyaa ma kaa war ga.

Pol ga albarka tee Irkoy se

nga binoo kañ a n'a yaynandi maaganda

3 Albarka ma bara Irkoy se kañ ti ir Koyoo Isa Almasihu Koyoo nda nga Baaba, nga ti tamallawey Baaba, nga ti bineyaynandiyan kul Irkoy

4 kañ g'ir biney yaynandi ir zarabey kul ra, hala ir ma hin ka borey kañ goo zarabi dumi kul kañ no ra biney yaynandi nda bineyaynandiroo kañ nda Irkoy n'ir zaati biney yaynandi.

5 Takaa kañ nda Almasihu zarabey ga booboka kaa ir ga, takaa din da nda Almasihu g'ir bineyaynandiroo boobandi.

6 Taka kul kañ nda ir biney maray, a man'ti kala war bineyaynandiroo nda war hallasiroo se. Nda ir biney yay, a man'ti kala war bineyaynandiroo se kañ ga kate war ma zarabey muje kañ ir zaati g'i muje.

7 Ir naataa war here ga hanse ka gaabi, zama ir ga bay kañ nda war na zarabey muje ir bande, war ga duu war bagaa bineyaynandiroo mo ir bande.

8 Ir armey, ir si baa war ma jan̄ ka bay kañ zaraboo kañ duu ir Azi gandaa ra hanse k'ir šiita hala nongu kañ ra a bisa ir gaaboo. Ir too nongu kañ ra ir naataa hun hunayan se.

9 Ir hongu ir biney ra kañ buuyan kayandi ir se. Woo teendi hala ir masi duu ka naanay ir bon, ir ma naanay Irkoy kañ ga bukawey tunandi.

10 A n'ir soolam buuyan beeroo woo ra, a g'ir soolam da. Ir ga naata a ga [kañ] a g'ir soolam koyne.

11 War mo g'ir faaba nda Irkoy ḥaarayroo kañ war g'a tee ir se, hala Irkoy anneemaa nooyanoo

woo kaŋ ir duu a ma kate boro boobo ma albarka
danj Irkoy se ir maaganda.

Addaliloo kaŋ se Pol mana willi Korent jina

¹² Hayaa kaŋ nda ir ga fooma man'ti kala: ir
biney ga tee seede nda takaa kaŋ nda ir dira
adujnja ra, waaniwaani war jine, a teendi nda
taka sasawante nda henanyan kaŋ hun Irkoy do,
a mana teendi nda adamize lakkal, amma Irkoy
anneemaa nda a teendi.

¹³ Ir si haya kul hantum k'a sanba war se nda
man'ti haya kaŋ war ga hin k'a caw ka faham a
se. Ay ga naata kaŋ war ga kaa ka duu fahamay
timmante,

¹⁴ sanda takaa kaŋ nda war faham kaccu ir se
sohō da, kaŋ war ga fooma nda ir sanda takaa
kaŋ nda ir ga fooma nda war [ir] Koyoo Isa
zaaroo hane.

¹⁵ Naanaa woo ka kate ay baa ya koy war do
jina hala war ma duu anneema foo koyne.

¹⁶ Maanaa ya mma bisa war do ka koy Masedoni
gandaa ra, ya hun Masedoni ka yee war do
hala war m'ay faaba naarumaa se ka koy Žude
gandaa ra, amma a mana tee.

¹⁷ Waatoo kaŋ ay ga woo kayandi, ay lakkaloo
nka sii ay ga wala? Hayey kaŋ ay ga nee ay m'i
tee ya mm'i tee sanda hundi-ibaayi kaŋ ra ay
ga nee «ayyo, ayyo» nda «kalaa, kalaa» waati
follokaa ra?

¹⁸ Amma Irkoy ga laadir, ir šennoo kaŋ ir n'a
har war se, a man'ti «ayyo» nda «kalaa».

¹⁹ Zama Irkoy Iz'aroo kaŋ ti Almasihu Isa, nga
šennoo kaŋ agay, nda Silweŋ, nda Timote n'a

waazu war game mana kaa ka nee «ayyo» nda «kalaa» nongu follokaa ra, amma «ayyo» de no.

²⁰ Irkoy allaahidey kul ti «ayyo» Almasihu albarka ra. Woo maaganda se ir ga nee «amin» nga albarkaa ra ka Irkoy beerandi.

²¹ Boraan kaj g'ir nda war tabatandi cere ga Almasihu albarkaa ra, kaj n'ir yon k'ir dan jere ga, boraan man'ti kala Irkoy,

²² nga ka nga tammaasaa dan ir ga, ka nga Hundoo gomney gorandi ir biney ra. Hundoo woo ti tolmaa kaj g'ir hakiikandi kaj ir ga duu nga gomney jerey.

²³ Agay, ay hundoo ga Irkoy ga tee ya ne seede kaj hala war masi duu šiitay, nga se ya na koy koyne Korent.

²⁴ Man'ti ir mma hini fur war naanaa bon, amma ir mma goy nda cere war jaaloo maaganda se, zama naanaa ka war kayandi.

2

¹ Woo se ay nee ay bon se ay si yee war do nda binemarayyan.

² Nda agay, ay na war biney maray, may no m'ay jaalandi, nda man'ti war kaj ay na war biney maray?

³ Ya nka woo hantum, hala nda ay kaa, borey kaj ga hima ka tee ya ne jaali masi tee ya ne binemarayyan. War here, ay ga naanay ka bay kaj ay jaaloo ti war kul jaaloo.

⁴ Ay hantum war se zarabi beeri ra, nda binešiitay, nda munday boobo, man'ti war binemarayyan se, amma hala war ma duu ka bajoo bay kaj ay g'a tee war se cere-cere ga.

KORENT BOREY BATAGA 2to 2:5 v KORENT BOREY BATAGA 2to 2:14

Pol nee kañ toopekaa ma yaafandi

⁵ Nda boro na binemarayyan tee, man'ti agay hinne binoo no a n'a maray, amma nongu foo ra, bila nda ay ma alhaddu hoo, war kul no a na war maray.

⁶ Boraa woo, zukandoo kañ boro booboo n'a dan a ga wasa a se.

⁷ Woo se war mas'a dii a se, war mma hima ka yaafa a se, war ma binoo dan hala binemarayyan beeri masi koy duu a.

⁸ Adiši ay g'a w提醒 war ga, war ma cebe a se kañ war ga bag'a.

⁹ Hayaa mo kañ se ay bay ka hantum war se man'ti kala ka dii war laadirtaraa wala war g'ay šenney dii haya kul ra.

¹⁰ Nda war na haya yaafa boro se, agay mo ga yaafa boraa se. Nda ay na haya yaafa, ay man'a tee kala war maaganda se Almasihu jine,

¹¹ hala Ibilisi mas'ir darga, zama nga anniawey si dere ir se.

Binemarayyanoo kañ duu Pol Trowas

¹² Kañ ay too Trowas koyraa ra AlmasihuAlhabar Boryaa waazuroo maaganda se, ba kañ ir Koyoo na mee feeri ya ne no din,

¹³ ay hundoo mana duu hunanzamay kul, zama ay man'ay armaa Tit gar no din. Woo se ay n'i hoy baani ka koy Masedoni.

Irkoy ga kate boro ma duu hinay Almasihu albarkaa ra

¹⁴ Albarkaa ma bara Irkoy se kañ waati kul a g'ir hangandi Almasihu bande hayey kañ a hin ey ra, de mo ir no a n'ir dan ir ma Almasihu

bayrandi nongoo kul ra, sanda turaari hew kañ ga say nongoo kul ra,

¹⁵ zama ir man'ti kala Almasihu sunnaara Irkoy se, borey kañ ga hallasi game nda wey kañ ga halaci game.

¹⁶ Affooyan se buuyan hew no kañ ga kate buuyan, affooyan se hunayan hew no kañ ga kate hunayan. May no ma bara nda haya kañ ga a wasa ka goyoo woo tee?

¹⁷ Zama ir si Irkoy meešennoo tee maamala haya sanda boro boobey din. Ir ga šelañ henanyan ra, ir ga šelañ sanda boroyan kañ hun Irkoy do ka šelañ Irkoy jine Almasihu albarkaa ra.

3

Amaana taagaa goykey

¹ Ir mma sintin ka yee k'ir boñ saabu wala? A mma too ir ma bataga hantum war se kañ g'ir saabu sanda takaa kañ boro fooyan g'a tee, wala mo ka duu bataga ka hun war do wala?

² War hunday ti batagaa kañ g'ir saabu, a hantumandi ir biney ra, adamizey kul g'a bay i g'a caw.

³ A ga kaaray kañ war man'ti kala Almasihu batagaa kañ ir goyoo n'a tee. Man'ti dawa nda a hantumandi, Irkoy hunantaa Hundoo k'a hantum. Man'ti tondi walha ga a hantumandi, war biney bašoo ga a hantumandi.

⁴ Woo kañ ir n'a har, ir ga naanay ka bay kañ ir mana duu a kala Almasihu albarkaa ra Irkoy jine.

5 Man'ti ir mma hongu kañ ir goo nda hini kañ ir duu a ir boñ ra, ir hinoo si hun kala Irkoy do.

6 Nga no k'ir noo hini ir ma tee amaana taagaa se goykaw. Amaanaa woo mana hun ašariyaa hantumoo harfu ra, Irkoy Hundoo ra a hun, zama ašariyaa hantumoo harfoo mma wiiya, Irkoy Hundoo ga hunayan noo.

7 Buuyan goyoo* žeerandi ka hantumandi tondiyañ ga, de annuura g'a kuubi k'a bere hala nongu kañ ra Izirayel borey si hin ka moo kanji Musa ndumoo ga, annuuraa kañ goo ndumoo ga se, ka gar haya bisante no.

8 De Irkoy Hundoo goyoo si annuura cebe kañ bisa woo wala?

9 Nda zukandoo goyoo goo nda darža, goyoo kañ ga kate šerretaray ga hanse ka bisa a darža.

10 Ka sawa nda woo, ba darža bisantaa man'ti baffoo darža beeroo woo jine.

11 Zama nda haya bisantaa duu darža, de woo kañ ga duumi si hanse ka bisa a darža wala?

12 Naataa dumoo woo kañ goo ir se, nga se ir goo nda naanay timmante.

13 De mo ir si Musa takaa tee kañ na sanfiti dan nga ndumoo ga hala Izirayel borey masi dii annuuraa benyanoo kañ ti haya bisante.

14 Amma ngi lakkaley šendi, hala hõ, nda i ga amaana žeena caw sanfitoo follokaa no ma cindi mopey ga. Sanfitoo woo si hun, amma Irkoy g'a kaa Almasihu albarkaa ra.

* **3:7 3.7** Ne ra «buuyan goyoo» man'ti kala ašariyaa kañ nondi Izirayel borey se, Fattaroo 34.29–30.

15 Hala hõ, waati kañ i ga Musa citaaboo caw, sanfiti ga guma biney ga.

16 Amma waati kañ boro bere ir Koyoo here, sanfitoo ga hun,

17 ka gar «ir Koyoo» man’ti kala Irkoy Hundoo, de mo nongu kañ ra ir Koyoo Hundoo goo, borcintaray goo no din.

18 Ir kul, ir ndumey si guma, ir ga dii ir Koyoo annuuraa sanda diji ra[†]. Ir goo ma bere ka tee nga himakasinaa darža ra kañ mma koy de a ga tonton ir Koyoo kañ ti Irkoy Hundoo albarkaa ra.

4

Alman kañ goo labu kusuyan ra

1 Irkoy tamalla ir se ka goyoo woo talfi ir ga, woo se ir biney si hun.

2 Ir wanji hayey ga kañ ga teendi tuguyan ra kañ ti haawi hayayan. Ir si dira carmay ra, ir si Irkoy meešennoo barmay. Ir mma cimoo har a ga kaaray, hala boro foo kul m’ir saabu Irkoy jine.

3 Koyne mo nda ir Alhabar Boryaa goo tuguyan ra, a sii tuguyan ra kala borey kañ ga halaci se,

4 borey kañ si naanay kañ zamanoo woo koyoo na lakkaley danandi hala i masih dii Alhabar Boryaa annuuraa kañ ti Almasihu daržaa kañ ti Irkoy biyoo.

5 Man’ti ir boj no ir g’ä har ir waazey ra, Isa Almasihu no ir g’ä har sanda Koy ir waazey ra.

[†] **3:18 3.18** «ir ga dii ir Koyoo annuuraa sanda diji ra», Grek šenni ra, almaganaa faa ti «ir Koyoo annuuraa ga dii garaw ir ga sanda diji».

Amma ir, ir ga nee war tamey ti ir Isa maaganda se.

⁶ Zama Irkoy nee: «Gaayoo ma dii kubaa ra»*, nga no ka dii ir biney ra ka nga daržaa kañ ga dii [Isa] Almasihu ndumoo ga bayrandi ir se.

⁷ Amma ir ga hima nda labu kusuyañ kañ ra almaanoo woo goo hala boro ma dii kaaray kañ hinoo woo kañ cine sii mana hun kala Irkoy do, a mana hun ir do.

⁸ Ir biney ga maray nongoo kul here, amma ir mana mongandi, ir bojey goo kulba, amma ir naataa mana hun.

⁹ Ir gurzugandi, amma ir mana nañandi, ir warrandi ganda, amma ir mana halaci.

¹⁰ Waati kul ir ga Isa buuyanoo maate ir gaahamoo ra, hala mo Isa hunaroo ma bangandi ir gaahamey ra.

¹¹ Zama ir kañ ga huna, waati kul ir ga nondi buuyan se Isa maaganda se hala mo Isa hunaroo ma bangandi ir hamey kañ ga kaa ka buu ra.

¹² Woo ra buuyanoo goo ma goy ir ra, amma hunaroo goo ma goy war ra.

¹³ Ir kul goo nda lakkal follokaa naanaa ra sanda takaa kañ nda a hantumandi Citaaboo ra ka nee: «Ya nka naanay, woo se ay šelañ.»† Ir mo, ir nka naanay, woo se ir ga šelañ,

¹⁴ zama ir ga bay kañ boraa kañ n'ir Koyoo Isa tunandi, g'ir mo tunandi Isa bande, k'ir nda war dan nga jere.

¹⁵ Woo kul si teendi kala war se, hala Irkoy anneemaa ma tonton ka too boro booboo do, i ma hanse ka albarka tee Irkoy se k'a beerandi.

* **4:6 4.6** Sintinoo 1.3. † **4:13 4.13** Zabur 116.10.

Ir ga naanaa ka dira

¹⁶ Woo se ir biney si hun, ba nda ir tarayheroо
goo ma hasara, ir kuneheroо mma taaga zaari ka
kaа zaari.

¹⁷ Ir zaraboo kaј si beeri man'ti kala waati
kayna, darža beeri abadante kaј si neešandi
hansandi ir se.

¹⁸ Ir s'ir moNEY kanji hayey kaј ir ga dii ey ga,
wey kaј si diyandi ga ir g'ir moNEY kanji, zama
hayey kaј boro ga dii ey man'ti kala waati kayna
hayayaњ, wey kaј boro si dii ey man'ti kala haya
abadanteyanj.

5

¹ Zama ir ga bay kaј nda ir hugoo kaј
ti gaahamoo kaј ra ir goo halaci kaј man'ti
kala hukkum yaada laboo ga, ir goo nda hugu
abadante beenaa ra kaј Irkoy n'a cin ir se, hugu
no kaј kabe man'a cin.

² Hukkumoo woo ra ir ga taabi, ir ga hanse ka
baa ir ma huru ir gorodogoo ra kaј goo beenaa
ra,

³ woo ra ir ga garandi kaј darbay goo ir ga, ir
sii gaa koonu.

⁴ Zama ir wey kaј goo hukkumoo cire, ir ga
taabi, jeraw goo ir boň. Man'ti ir mma baa ir
ma darbaa kaa ir ga kaј ti ir gaahamoo, amma
beenaa wanoo no ir ga baa ir m'a daň ir ga, hala
hunaroo ma haya kaј ga kaa ka buu gon.

⁵ Boraan kaј n'ir tee woo hunday se man'ti kala
Irkoy kaј n'ir noo nga Hundoo. Hundoo woo
ti tolmaa kaј g'ir hakiikandi kaј ir ga duu nga
gomney jerey.

6 Waati kul ir ga naanay ka bay kanj hala de
ir goo kunturoo woo ra, ir ga mooru ir Koyoo
dogoo.

7 Zama naanay nda ir ga dira, man'ti woo kanj
ir moneg ga dii a nda ir ga dira.

8 Ir ga hanse ka naanay, ir baa mo ir ma hun
kunturoo woo ra hala ir ma koy goro ir Koyoo
jere.

9 Woo maaganda se a ma tee ir goo kunturoo
woo ra wala ir sii a ra, ir ga gaabandi ir ma kan
ir Koyoo se.

10 Zama a nka tilasu ir kul ma bangay Almasihu
ciitidogoo ra, hala boro foo kul ma duu woo kanj
a n'a tee ihenna ra wala ilaala ra waatoo kanj a
goo nga kunturoo ra.

Almasihu n'ir nda Irkoy waafakandi

11 Sohō kanj ir ga hunburaa kanj ga hima ka
teendi ir Koyoo se bay, woo se ir ga taka tee borey
ma yadda ir se. Irkoy ga hanse k'ir takaa bay.
Ay ga naata kanj war mo ga hanse k'ir bay war
lakkaley ra.

12 Man'ti ir mma yee k'ir boj saabu war se
koyne, ir mma war noo takaa kanj nda war ma
fooma nda ir, hala war ma hin ka borey zaabi
kanj ga fooma nda ngi tarayheroo bila ngi biney.

13 Nda ir lakkaley hasara, a mana teendi kala
Irkoy se, nda ir lakkaley boori, a mana teendi
kala war se.

14 Almasihu bajoo g'ir šiita, ir ga hakiika ka
bay kanj boro folloku buu borey kul dogoo ra,
adiši borey kul buu.

15 A buu borey kul se hala borey kanj ga huna
masi huna ngi boj se koyne, amma i ma huna
boraal se kanj buu i se, a tun i se.

16 Woo maaganda se sohō ir si boro kul dii nda
takaa kanj nda adamizey g'a dii. Ba nda ir na
Almasihu dii nda adamizey takaa, sohō ir si yee
k'a dii nda takaa din.

17 Woo se boro kanj goo Almasihu bande, boraal
nka tee takari taaga, haya žeeney ben, nga ne,
hayey [kul] tee itaji.

18 Woo kul mana hun kala Irkoy ra kanj n'ir nda
nga waafakandi Almasihu albarkaa ra, de mo a
na waafakandiyen goyoo talfi ir ga.

19 Irkoy mma goy nda Almasihu* ka nga nda
adunja waafakandi. A mana ngi laybey dii i se.
A na waafakandiyen ſennoo danj ir biney ra.

20 Adiši ir man'ti kala dontokawyan Almasihu
maajnoo ga. A ga tee sanda ir mijney nda Irkoy
ga ſelaŋ. Ir g'a ḥaaray Almasihu maajnoo ga war
ma naŋ war nda Irkoy ma waafaku.

21 Boraal kanj mana zunubu tee, Irkoy n'a tee
zunubu ir maaganda se, hala nga bande ir ma
tee Irkoy boro ſerranteyan.

6

1 Adiši ir kanj ti Irkoy goykasinawey, ir g'a wiri
war ga, war kanj duu Irkoy anneemaa, war masi
naŋ a ma tee yaada,

2 zama Irkoy nee:
«Ay na ni ḥaarayroo taa waatoo kanj kan ya ne
ra.

* **5:19 5.19** «Irkoy mma goy nda Almasihu», Grek ſenni ra,
almaganaa faa ti «Irkoy cindi Almasihu ra».

Hallasiroo zaaroo hane, ay na ni faaba.»*

Nga ne, sohō da ti waatoo kañ kan a se. Nga ne, hō ti hallasiroo zaaroo.

³ Taka kul ra, ir si haya tee kañ ga boro kañandi, hala boro mas'ir goyoo maajpoo hasara.

⁴ Ir mm'ir boñ cebe sanda Irkoy tam hennayan haya kul ra. Ir g'a cebe nda muneyan beeri, nda zarabiyan, nda tilasuyan, nda šiitayyan,

⁵ nda barzuyañ, nda kasa huruyañ, nda tureyañ, nda taabiyañ, nda hannayañ, nda mee-hawyañ,

⁶ nda henanyan, nda bayray, nda suuri, nda borohennataray, nda Hundi Henanantaa, nda baji kañ ra almunafikitaray sii,

⁷ nda cimoo šennoo, nda Irkoy hinoo, nda šerretaray wongu jinawey kañ nda ir ga kara, ir ga gagay.

⁸ Borey g'ir dii nda jeeray nda kaynandiyan, maa hennay nda maa futay ra. K'ir dii sanda boro derandikawayan, ka gar ir kone cimoo goo.

⁹ I g'ir tee boroyañ kañ si bayrandi, ka gar ir ga hanse ka bayrandi, sanda boroyañ kañ buu, ka gar ir ga huna, sanda boroyañ kañ zukandi, amma ir mana wiiyandi.

¹⁰ I g'ir dii sanda boroyañ kañ biney maray, ka gar waati kul ir ga jaali, sanda talkayañ, amma ir ga boro boobo tee almankoyni, sanda boroyañ kañ sii nda baffoo, ka gar ir goo nda haya kul.

¹¹ Korent borey, ir n'ir mijney feeri ka šelanj war se kaaray, ir hanse k'ir biney feeri war se.

¹² Ir mana war šiita, amma war hunday ka war bajoo kaccandi.

* **6:2 6.2** Ezayi 49.8.

13 Sohō ay ga šelaŋ war se sanda ay izey, war mo, war ma taka follokaa tee ir se, war ma hanse ka war biney feeri.

Irkoy hunantaa hugoo

14 War masi marga nda borey kaŋ man'ti ganakaw ka tee affoo. Zama macin margari bara šerretaray nda ifutu game? Macin margari bara gaayoo nda kubaa game?

15 Macin ti waafakaa kaŋ goo Almasihu nda Ibilisi[†] game? Macin bara Irkoy ganakaa nda boraa kaŋ man'ti ganakaw game?

16 Cin ti hayaa kaŋ goo Irkoy hugoo nda tooruyaŋ game? Ka gar ir man'ti kala Irkoy hunantaa hugoo, sanda hayaa kaŋ Irkoy n'a har ka nee nga Citaaboo ra:

«Ay ga goro i game, ay ga dira i bande.

Ay ga tee ngi Irkoy, i ga tee ay jamaa.»‡

17 Woo maaganda se

«wa fatta i game ka fay nda ey.» Ir Koyoo n'a har.

«War masi tuku haya žiiba ga,

de agay, ay ga yadda war ga.»§

18 ««Ay ga tee war se baaba,

war ga tee ya ne iz'aruyaŋ nda ize woyyanj.»

Ir Koyoo Hini-kul-koyoo k'a har.»*

7

1 Ay baakey, allaahidey wey kaŋ ir duu ey maaganda se, ir m'ir boŋ henanandi ka kaaray

† **6:15 6.15** Grek šenni ra, ne ra Ibilisi da se i ga nee Beliyar.

‡ **6:16 6.16** Sargarey 26.12; Ezekiyel 37.27. § **6:17 6.17** Ezayi

52.11. * **6:18 6.18** Samiyel 2to 7.14; Oze 2.1.

ka hun gaaham nda hundi žibi dumi kul ga. Ir ma henanyan timmante tee Irkoy hunburaa ra.

Pol jaaloo Korent borey tuubiroo se

² Wa yadda ir ga, ir mana boro kul toope, ir mana boro kul halaci, ir mana boro kul haya ḥaa.

³ Man'ti ya mma hayey wey har ka war zukandi, zama ay n'a har ka bisa kañ war goo ir biney ra, nda hunayan no wala buuyan no ir goo cere bande.

⁴ Ay ga hanse ka naanay war, ay ga hanse ka fooma nda war. Ay binoo yay hala nongu kañ ga a si bisa, ir binemarayyaney kul ra, ay ga hanse ka jaali.

⁵ Nda cimi, waatoo kañ ir too Masedoni, ir mana duu hunanzamay, ir biney maray nongu kul here, tarayhere wongu, kunehere hunburay.

⁶ Amma boraan kañ ga borey kan biney maray biney yaynandi kañ ti Irkoy n'ir biney yaynandi nda Tit kaayanoo.

⁷ Man'ti nga kaayanoo hinne, amma bineyaynandiroo mo kañ nda war na binoo yaynandi, a hanse k'ir mo biney yaynandi. A n'ir bayrandi kañ ir faajoo ga hanse ka bara war ra, nda war h̄eeney, nda war gaabandiyen beeroo kañ war g'a tee ya ne. Woo kate ya jaali ka tonton.

⁸ Ba nda ay batagaa kañ ay bay k'a hantum war se na war biney maray, ay si nimsi. Waatoo kañ ay dii batagaa din na war biney maray waati kayna, ay nimsi.

⁹ Sohō ay ga jaali, man'ti kañ se war biney maray, amma ay ga jaali, zama war biney

maray hala nongu kanj ra war tuubi. War binemarayyanoo sawa nda Irkoy ibaayoo, ka gar ir mana ifutu kul tee war se.

¹⁰ Zama binemarayyan kanj teendi ka sawa nda Irkoy ibaayoo ga kate boro binoo ma maray ka tuubi ka duu hallasiyan, boro si nimsi a ra, amma adunja binemarayyanoo ga kate buuyan.

¹¹ Zama nga ne, war binemarayyanoo hunday kanj sawa nda Irkoy ibaayoo mana kate kala war ma duu ka hayey tee nda cahāyan nda jaali, nda faasayan beeri, nda binetunyan beeri, nda hunburay beeri, nda faajiyān beeri, nda gaabandiyān beeri, nda ba zukandiyan beeri. Nongoo kul here war cebe kanj war ga henan hayaa woo ra.

¹² Adiši, nda ay hantum war se mo, man'ti goy futu teekaa wala boraakanj se goy futaa teendi se. Ya nka hantum hala bajoo kanj war g'a tee ir se Irkoy jine ma bayrandi war se.

¹³ Woo ti haya kanj n'ir biney yaynandi. Ka tonton ir bineyaynandiroo ga, ir hanse ka jaali nda Tit jaaliyanoo, zama war kul na binoo kaanandi.

¹⁴ Ay na war ka fooma a jine, amma ay mana haw. Takaa kanj nda ir ga cimoo har war se haya kul ra, takaa din nda ir na war ka fooma Tit jine, a tee cimi.

¹⁵ Bajoo kanj a g'a tee war se ga hanse ka tonton nda a hongu takaa kanj nda war kul ga hayey tee kanj a n'i har, nda takaa kanj nda war n'a kubay henna nda hunburay nda jijiriyān.

¹⁶ Ay ga jaali nda kanj haya kul here ay ga naanay war.

8

Kabedoonay nooyan

¹ Ir armey, ir ga Irkoy anneemaa kaŋ a n'a noo Masedoni Egilizey se bayrandi war se.

² Binemarayyanoo kaŋ duu ey siiyan beeri ra, ngi jaali beeroo kate i ma hanse ka tee kabedoona ka noo, ba nda i ga hanse ka talka.

³ I na ngi hinagoo tee. Ay ga seede kaŋ i bisa ngi hinagoo bila gaabi.

⁴ I n'ir gaabi ir ma naŋ ngi ma ngi bagaa daŋ faabaroo ra kaŋ ga sanbandi Irkoy boro henanantey* se.

⁵ I n'a tee haya kaŋ bisa woo kaŋ ir g'a naata. I nka jin ka ngi boŋ noo ir Koyoo se, woo banda ga, i na ngi boŋ noo ir se ka sawa nda Irkoy ibaayoo.

⁶ Woo se ir na Tit suurandi ka nee a se kaŋ takaa kaŋ nda a na faabaroo sintin war se, takaa din da a ma koy a ga k'a timmandi.

⁷ War duu haya nongoo kul here: naanay ra, šenni ra, bayray ra, gaabandiyan kul here, nda bajoo kaŋ ir na war tuti war m'a tee, war ma tee mo kabedoona faabaroo woo ra.

⁸ Man'ti ya mma šelanj war se ka war noo yamar, amma ya mma boro fooyan gaabandiroo har war se hala ya war bajoo guna wala baji cimi no.

⁹ War g'ir Koyoo Isa Almasihu anneemaa bay, takaa kaŋ nda nga kaŋ goo nda haya kul, a na nga boŋ tee talka war maaganda se, hala nga talkataraa ra war ma duu haya kul.

* **8:4 8.4** Boro henanantey sii kala Žerizalem, Rom borey batagaa 15.25–26.

¹⁰ Ay lakkaloo no kaŋ ay g'a har war se woo ga, haya no kaŋ ga war nafa, war kaŋ za manna, war mana sintin hinne ka faabaroo tee, amma war nka kayandi mo k'a tee.

¹¹ Sohō, wa guna k'a tee k'a timmandi, hala anniyaan kaŋ war n'a zaa a se, a ma tee nda a ka sawa nda war hinagoo.

¹² Nda anniya henna goo ka noo, haya kaŋ n'n'a noo ga too, woo kaŋ sii ma ne si hāandi.

¹³ Man'ti war mma boroyaŋ feeri ka war boŋ tilasandi, amma war kul ma sawa.

¹⁴ Sohō war duuray beeroo ma tilasu kaa i ga, hala ngi mo han foo, ngi duuray beeroo ma tilasu kaa war ga, hala war kul ma sawa.

¹⁵ Sanda takaa kaŋ nda a hantumandi Citaaboo ra ka nee:

«Boraa kaŋ na iboobo kuuna, a mana boobo a se.

Woo kaŋ na ikaccu kuuna, a mana kacca a se.»[†]

Tit nda nga hangasiney sanbandi Korent

¹⁶ Albarka ma bara Irkoy se kaŋ daŋ Tit binoo ra a ma gaabandi war se, sanda woo kaŋ ir goo m'a tee.

¹⁷ A n'ir hoyraa dii. A goo nda anniya henna, a koy nda nga boŋ war do.

¹⁸ Ir n'ir armaa kaŋ Egilizey kul g'a saabu Alhabar Boryaa here sanba a bande.

¹⁹ Man'ti woo hinne, naarumaa kaŋ ir goo m'a tee faabaroo fondaa ra, Egilizey[‡] hunday k'a suuba a ma hanga ir bande. Ir si diraa woo

[†] **8:15 8.15** Fattaroo 16.18. [‡] **8:19 8.19** Egilizey man'ti kala Masedoni Egilizey.

tee kala ka darža danj ir Koyoo ga, k'ir anniya hennaa cebe.

²⁰ Ir ga taka kul tee hala boro kul mas'ir maajoo hasara nooru beeroo woo goyoo ra kaŋ ir g'a tee.

²¹ Ir ga ceeci ka goy henna tee, man'ti ir Koyoo hinne jine, ir g'a tee adamizey mo jine.

²² Ir n'ir armaa sanba i bande. Cee booboo ir n'a sii haya booboo ra, ir kaa ka gar kaŋ a goo nda anniya henna. Sohō a goo nda anniya ka bisa, naanay beeroo maaganda kaŋ a g'a tee war se.

²³ Tit, a man'ti kala ay hangasinoo, ay goykasi-naa no war here. Ir armey jerey, Egilizey§ dontokawyaŋ no. Ngi ti Almasihu daržaa.

²⁴ Woo se w'i cebe kaŋ war ga bag'ey nda cimi, hala Egilizey ma dii a, i ma bay kaŋ ir goo nda cimi ka fooma nda war.

9

Pol na hoyray foo noo koyne faabaroo here

Irkoy boro henanantey se kaŋ goo Žerizalem

¹ Haya kaŋ ti gaakasinaa kaŋ war g'a tee Irkoy boro henanantey* se, a sii nda addalil ya hantum war se a ga koyne.

² Ay ga war anniya hennaa bay, ay n'a ka fooma Masedoni borey jine ka nee: «Akay borey soolu za manna.» War gaabandiroo na ngi jere beeroo tuti kabedoonay ra.

§ 8:23 8.23 Sorro 19to.

* 9:1 9.1 Boro henanantey sii kala Žerizalem, zamnaa 8.4.

³ Ay n'ir armey sanba war do hala takaa kanj nda ir na war ka fooma masi koy tee yaada. Ya mma baa war ma soolu sanda takaa kanj nda ay n'a har.

⁴ Nda man'ti woo, nda Masedoni boroyaŋ kaa ay bande, de i gar war mana soolu, ir ga haw, zama ir ga naanay war. War, war haawoo no.

⁵ Woo maaganda se ay dii kanj a ga hima y'a wiri ir armey ga i m'ir jin war do hala gaakasinaa kanj war n'a har, i ma huga nda a hala ay ga kaa. Woo ra a ga soolu hala ay ga kaa, a ma tee kabedoonay haya, a masi tee gaabi.

⁶ War ma bay kanj boro kanj na ikaccu duma ga ikaccu hegay, boro kanj na iboobo duma ga iboobo hegay.

⁷ Boro foo kul ma noo nda woo kanj a n'a kayandi nga binoo ra, bila nimsay, bila gaabi, zama Irkoy ga baa boro kanj ga noo nda naaliyan.

⁸ Irkoy goo nda hini ka anneema dumi kul doori war boŋ hala waati kul war ma bara nda woo kanj ga war ga too hala a ma hoo, war ma hin ka teegoy henna dumi kul tee,

⁹ sanda takaa kanj nda a hantumandi Citaaboo ra ka nee:

«Boro kanj ga talkey noo ka gomni doori i boŋ, nga šerretaraa ga cindi hala abada.»[†]

¹⁰ Boraal kanj ga sayakaa noo dumi, a ga takula noo a ma tee ḥaayan. A ga war noo ka war dumiyoo boobandi, a ga tonton war šerretaraa teegoy hennawey ga.

[†] 9:9 9.9 Zabur 112.9.

11 A ga war tee almankoyni nongoo kul here nda kabedoonay dumi kul, ir bande boro boobo ma albarka dan Irkoy se.

12 Zama faabaroo kan war g'a tee si hima ka tee Irkoy boro henanantey hinne nafaa, a ga hima ka kate boro boobo ma hanse ka albarka tee Irkoy se.

13 Nda i duu faabaroo woo, i ga Irkoy saabu nda takaa kan nda war ga cebe kan war ga hañajer AlmasihuAlhabar Boryaa se nda kabedoonay gaakasinaa kan war g'a tee ngi nda borey kul se.

14 Anneema beeroo kan Irkoy n'a noo war se sabbu se i ga Irkoy ḥaaray war se, ka baa war ka tonton.

15 Albarka ma bara Irkoy se nga nooyan beeroo kan si hin ka fillandi maaganda se.

10

Pol na borey zaabi kan ga šelaŋ nga goyoo ga

1 Agay hunday Pol, ay ga haya foo wiri war ga Almasihu bineyaynaa nda nga borohennataraa maaganda se, agay kan borey ga nee kan nda ay goo war game ka dii cere moo nda moo, ay ga tee boro yayna, amma nda ay mooru war, ay ga tee war se boro konna.

2 Ay g'a ḥaaray war ga, waati kan ay goo war game, ay mas'ay borokonnotaraa cebe war se takaa kan nda ay ga yadda k'a cebe borey se kan ga hongu adamizey takaa nda ir ga dira.

3 Cimi no adamizeyan ti ir, amma ir si wongu nda adamizey takaa.

⁴ Zama ir wongu jinawey man'ti adamizey waney, jinay gaabanteyaŋ no kaŋ hun Irkoy do ka hayey kaŋ ga wongu kubay, k'i kayri, ka taari miilewey halaci,

⁵ ka hini kul kaŋ ga nga boŋ jer ka kay Irkoy bayraa se halaci, ka kate miile kul ma yee Almasihu cire k'a beerandi.

⁶ Ir soolu, waati kaŋ war ga haŋajer ir se haya kul ra, ir ga zunubu kul zukandi.

⁷ Wa hayey guna nda cimi! Nda boro ga naanay kaŋ nga goo Almasihu bande, a ma haya foo bay: takaa kaŋ nda a goo Almasihu bande, takaa din da ir mo Almasihu wane nda ir.

⁸ Ba nda ay ga bolsay kayna nda hinoo kaŋ ir Koyoo n'a noo ya ne, a man'ti kala war tontonyanoo se, man'ti war kayriyanoo se. Woo si ay haawandi.

⁹ Ay si baa a ma tee sanda ya mma war hunburandi nda ay batagawey,

¹⁰ zama i nee batagawey wey ga tiŋ, i goo nda gaabi, amma agay azzaatoo sii nda gaabi, ay meešenney man'ti baffoo.

¹¹ Boro kaŋ ga woo hongu ma bay kaŋ takaa kaŋ ti ir šennoo ir batagawey ra nda ir ga mooru, nga da ti ir teegoyey nda ir goo war game.

¹² Ir mma yadda hunday k'ir boŋ sawandi nda boroyaŋ kaŋ goo borey ra kaŋ ga ngi boŋ saabu, wala k'ir boŋ kar i ga. Amma ngi, i mma ngi boŋ neesi ngi boŋ ga, ka ngi boŋ kar ngi boŋ ga, i si faham baffoo.

¹³ Ir, ir si bolsay ka hoo, amma kaydogoo kaŋ Irkoy n'a daŋ ir ga, ir ga kay kaydogoo din ga, nga ka kate ir too kate mo hala war do.

¹⁴ Ir si bisa ir kaydogoo din ga, sanda ir mana too kate hala war do. Ir nka mana too kate hala war do nda Almasihu Alhabar Boryaa wala?

¹⁵ Ir si hanse ka bolsay nda goy waaney, amma ir ga naata, nda war naanaa koy jine ka tonton, ir goyoo ga tonton ka sawa nda kanjey kaŋ ir n'i kayandi.

¹⁶ Woo ra ir ga Alhabar Boryaa ka koy koyrawey kaŋ goo war se jine, bila nda ir ma bolsay nda goyey kaŋ teendi ka ben farru waaney rā.

¹⁷ «Boro kaŋ ga bolsay ma bolsay nda ir Koyoo.»*

¹⁸ Man'ti boraakaa kaŋ ga nga boŋ saabu no i g'a dii laadirante, boraakaa kaŋ ir Koyoo g'a saabu ti laadirante.

11

Boroyaŋ kaŋ ga ngi boŋ himandi diyaw

¹ Nda a gar ba war mma hin k'ay hollokotaraa ikayna muñe, wa alha naŋ, war m'ay suuri kayna.

² Ay ga canse war se nda canseyan kaŋ hun Irkoy do, zama ya nka war cewoo dii kurpe folloku se, ka war kayandi Almasihu jine sanda hondiyaw henanante kaŋ si aru bay.

³ Amma ay ga hunbur, sanda takaa kaŋ nda gondoo na nga carmaa ka Haawa darga, takaa din da war lakkaley masi koy bere ka laadirtaray [nda henanyan] naŋ kaŋ Almasihu ga hima nda a.

* **10:17 10.17** Žeremi 9.23.

⁴ Zama nda boro kaa ka Isa tana waazu war se kaŋ man'ti woo kaŋ ir n'a har, wala war duu hundi tana kaŋ man'ti Irkoy Hundoo kaŋ war duu a ka bisa, wala alhabar borya tana kaŋ man'ti Alhabar Boryaa kaŋ war duu a, war ga yadda ngi mo ga.

⁵ Agay do war diyaw beerey mana bisa agay nda baffoo.

⁶ Ba nda ay si waana šenni, man'ti bayray here, taka kul kaŋ no nda nongu kul kaŋ no, ir n'a cebe war se.

⁷ Wala zunubu no y'ay boŋ yeeti ganda hala war ma duu ka jer waatoo kaŋ ay na Irkoy Alhabar Boryaa har war se yaada?

⁸ Ay na Egiliz tanayaŋ kabey kokobu ka banaw taa i kone ka kaa ka war alhaadimay goyoo ra.

⁹ Waatoo kaŋ ay goo war do, kaŋ tilasu duu agay, ya na tee boro kul ga jeraw, zama ir armey kaŋ kaa ka hun Masedoni n'ay noo hayey kaŋ ga ay ga too. Haya kul here ay n'ay boŋ dii ya si tee war ga jeraw, ay ga koy a ga mo k'ay boŋ dii.

¹⁰ Hala de cimi no kaŋ Almasihu cimoo goo ay ra, boro kul s'ay ganji ya fooma Akay gandaa laamawey ra.

¹¹ Macin se? Ya nk'a tee, zama ay si baa war wala? Irkoy ga bay kaŋ ay ga baa war.

¹² Woo kaŋ ay goo m'a tee, ay ga cindi a ga, hala ya borey gagay kaŋ ga waati henna ceeci ka bolsay ka ngi boŋ sawandi nda ir.

¹³ Borey wey dumey man'ti kala taari diyawayan, goykaw darganteyan kaŋ ga ngi boŋ himandi Almasihu diyawayan.

14 A si boñhaw, Ibilisi hunday mma nga boñ himandi annuura almalayka.

15 Adiši a si boñhaw nga goykey mo ma ngi boñ himandi šerretaraa goykawayan. Amma ngi kokoroo ra i ga duu ngi teegoyey banaa.

Laazaabawey kañ duu Pol nga diyawtaraa ra

16 Ay ga yee k'a har, boro kul mas'ay dii sanda hollokom, wala mo war m'ay dii sanda hollokom hala agay mo, ya duu ka bolsay kayna.

17 Woo kañ ay g'a har, ay s'a har nda ir Koyoo takaa, hollokom takaa nda ay g'a har, nga ra ay ga naanay ka duu haya kañ nda ay ga bolsay.

18 Boro booboo ga fooma nda adamizetaray hayey, agay mo ga fooma.

19 War ga wan ka hollokomey hayey muñe, war kañ ga nee lakkalkoyniyan ti war!

20 War ga boro muñe kañ ga war tee bajna, wala boro kañ ga war hayaa taa, wala boro kañ ga war kabey koonandi, wala boro kañ ga war kaynandi, wala boro kañ ga war sanj.

21 Ay g'a har, ir haawoo no, a ga hima nda sanda ir nka yalaafu.

Haya kul kañ boro ga yadda k'a tee, ay ga šelanj sanda hollokom, ay ga yadda mo.

22 Ebereyan no wala? Agay da mo, nga da ti agay. Izirayel boroyañ no? Agay da, nga da ti agay. Ibirahima hayrey no wala? Agay da, nga hayroo ti agay.

23 Almasihu goykawayan no wala? Ay ga šelanj sanda saama, agay tiya ka bisa ey: ay taabi ka bisa ey, ay na kasu tee ka bisa ey, ay karandi laala ka bisa ey, cee booboo ay huru buuyan mee ga.

24 Cee guu Alyahuudey na barzu mee woytaaci
(40) kaŋ affoo g'a kuma kaa ay ra.*

25 Cee hinza ay barzandi, cee foo ay warrandi
nda tondi hala ya duu ka buu, cee hinza harihii
n'ay mun, ay na zaari foo nda cijin foo tee teekoo
ra.

26 Cee booboyaŋ ay naarumawey ra, ay huru
farratay ra isawey boŋ, ay huru farratay ra zay
beerey game, ay huru farratay ra ay dumoo
borey game, ay huru farratay ra dumey kaŋ
man'ti Alyahuudu game, ay huru farratay ra
koyraa ra, ay huru farratay ra saajoo ra, ay huru
farratay ra teekoo boŋ, ay huru farratay ra taari
armey game.

27 Ay goo taabi nda farayan ra, cee booboyaŋ ay
ga hanna, ay goo heray nda jaw ra, cee booboyaŋ
ay mana duu ka ɻaa, ay goo hargu nda bani ra.

28 Woo ti ya na hayey jerey kabu, hayaa kaŋ
g'ay kankam zaari kul ti Egilizey kul alhuzunoo.

29 May ka sii nda gaabi takaa kaŋ nda agay mo
sii nda gaabi? May no ka kaŋ zunubu ra, de a
s'ay dor?

30 Nda ay ga hima ka fooma, ay si fooma kala
nda ay gaabi jaŋaa.

31 Irkoy kaŋ ti ir Koyoo Isa Baaba, albarka ma
bara a ga hala abada, ga bay kaŋ ay si taari.

32 Kaŋ ay goo Damas koyraa ra, goforneroo kaŋ
goo kokoyoo Aretas cire na koyraa boroyaŋ dan
i m'ay koroši hala i m'ay dii.

33 Kokondo ra i n'ay dan k'ay zumandi nda
koyraa cetaa funeetaraa, woo k'ay kaa kaboo ra.

* **11:24 11.24** Alhukumoo 25.2-3.

12

Hayey kañ Pol dii ey bangayyan ra

¹ A nka tilasu ya fooma. Ba nda nafaw sii a ra, ay ga koy a ga k'ir Koyoo hayey kañ boro ga dii ey nda nga bangayyaney deede.

² Ay ga Almasihu ganakaw foo bay kañ zandi ka koy hala beene hinzantoo ra, a ga too jiiri woy cindi taaci (14). Nda nga azzaatoo no ka koy wala man'ti nga azzaatoo no, ay si bay, Irkoy no ma bay.

³ Ay ga bay kañ boraa din koy beenaa ra, nda nga azzaatoo ra no, wala man'ti nga azzaatoo ra no, ay si bay, Irkoy no ma bay,

⁴ a zandi ka koy hala alženna ra, a maa šenniyan kañ si deedandi, i si bisa boro se a m'i har.

⁵ Boraa woo dumoo nda ay ga fooma, amma agay hunday, ay si fooma nda haya kul kala ay gaabi jaŋja.

⁶ Nda ay ga baa ya fooma ay si tee hollokom, zama cimoo no ay g'a har. Amma ay g'ay boŋ dii hala boro mas'ay jer ka bisa woo kañ a ga dii a ay ga wala woo kañ a ga maa ay g'a har,

⁷ bangayyan beerey wey mo kañ a ga dii ey maaganda se. Haya huru ay hamoo ra kañ ma nee karji hala ya si duu k'ay boŋ jer. Ibilisi almalayka ka sanbandi a m'ay kar hala ya si duu k'ay boŋ jer.

⁸ Hayaa woo se, ay n'ir Koyoo ḥaaray cee hinza a m'a moorandi ay ga.

⁹ A nee ya ne: «Agay anneemaa ga ni wasa, zama gaabi jaŋjay ra ay hinoo ga diyandi kaaray.»

Adiši a ga hanse ka kan ya ne ya bolsay nda ay gaabi jaŋaa hala Almasihu hinoo ma cindi ay ga.

¹⁰ Woo se ay ga jaali nda ay gaabi jaŋaa, nda maahasarawayan, nda tilasuyaŋ, nda gurzugayaŋ, nda šiitayyaŋ ra Almasihu sabbu se, zama waati kaŋ ay sii nda gaabi, waatoo din no Almasihu g'ay noo gaabi.

Pol ga alhuzun Korent borey se

¹¹ Ay tee hollokom, war k'ay gaabi ya ti a, war ti borey kaŋ hima k'ay saabu, zama diyaw beerey wey mana bisa agay nda haya kul, ba kaŋ ay man'ti baffoo.

¹² Šikka sii diyaw silbawey, war dii ey war game nda ngi mujeyan beeroo. I teendi nda tammaasayaŋ, nda almunkaryaŋ, nda kayfiyaŋ albarkaa ra.

¹³ Macin no Egilizey jerey duu a kaŋ war mana duu a? Nda man'ti haya folloku kaŋ ti ya na tee war ga jeraw. Wa tooperoo woo yaafa ya ne!

¹⁴ Nga ne, cee hinzantoo ti woo ay ga soolu ka koy war do, de mo ay si tee war ga jeraw, zama man'ti war almaanoo bande ay goo, war hunday bande ay goo. Man'ti zankey no ma haya marga hayragey se, hayragey no ma marga zankey se.

¹⁵ A ga kan ya ne y'ay kabehayaa noo war se, ka agay hunday noo war se. Nda ay ga baa war ka tonton, haya no ma hun war bajoo ra ya ne wala?

¹⁶ Haya kul kaŋ no, agay, ya na tee war ga jeraw, amma boro fooyaŋ ga nee kaŋ ay ga caram, de mo carmay nda ay na war dii.

¹⁷ Borey kañ ay n'i sanba i ma koy war do, boro goo i ra kañ kate ya war haya ɻaa wala?

¹⁸ Ay n'a wiri Tit ga a ma koy war do. Ay n'ir armaa sanba a bande. Tit nka war haya ɻaa wala? Man'ti lakkal follokaa ra ir dira? Man'ti fondo follokaa ra ir dira?

¹⁹ A gay war ga hongu kañ ir mma faasa ir boñ se war jine, man'ti cimi no. Ir si šelañ kala Irkoy jine Almasihu albarkaa ra. Woo kul, ir baakey, ir s'a tee kala war tontonyanoo se.

²⁰ Ay ga hunbur waati kañ ay kaa ya si war gar taka kañ ga kan ya ne ga, de mo war mo mas'ay gar taka kañ ga kan war se ga. Ay ga hunbur ya yenjeyañ gar war game, nda canseyañ, nda binetunyaj, nda alhaasiditarayyan, nda cere maahasaraw, nda miimandayan, nda bolsay, nda taka ſiirayan.

²¹ Ay ga hunbur kañ hiino nda ay kaa war do, ay Koyoo masi koy ay yeeti ganda war jine. Boro booboyañ kañ na zunubu tee, de i mana tuubi ka hun ngi ſiiboo ga, nda woy nda aru izefututaraa ra, nda haya futu boonayyan ra kañ i n'i tee, ay ga h  e ngi maaganda se.

13

Hoyray kokorantey nda fooyanoo

¹ Cee hinzantoo ti woo kañ ay ga koy war do. «Ciiti kul masi dunbandi kala seede hinka wala ihinza seedetaraa ga.»*

² Borey kañ na zunuboo tee za ya na koy war do nda borey jerey kul, ay ga lakkaley zumandi

* 13:1 13.1 Alhukumoo 19.15.

KORENT BOREY BATAGA 2to 13:3 xxx KORENT BOREY BATAGA 2to 13:10

kanj ba nda ay sii no, sanda takaa kanj nda ay n'a
har i se ay koyyan hinkantoo ga kanj hiino nda
ay kaa, ay si boro kul kaa.

³ Sohō kanj war ga tammaasa ceeci kanj ay
mijnoo nda Almasihu ga šelanj, war ga dii a.
Almasihu hinagoo si kacca war here, a ga nga
hinoo cebe war game.

⁴ Zama a kanjandi sanda boro kanj sii nda
gaabi. Sohō, a ga huna Irkoy hinoo albarkaa ra.
Ir mo, takaa din da, ir sii nda gaabi, amma ir ga
huna a bande Irkoy hinoo albarkaa ra war here.

⁵ Wa war boj sii ka war boj guna ka dii wala
war goo naanaa fondaar. War nka si maate
kanj Isa Almasihu goo war ra? Nda man'ti woo,
war ga mongandi war naanaa ra.

⁶ Ay ga naata kanj war ga kaa ka bay kanj ir, ir
mana mongu.

⁷ Ir ga Irkoy ḡaaray war masi goy futu kul tee.
Man'ti ir mma baa ir ma cebe war se kanj ir n'ir
goyoo tee ka boori, ir mma baa war ma teegoy
henna tee, ba nda a ga hima nda sanda ir man'ir
goyoo tee ka boori.

⁸ Zama ir sii nda hini ka cimi tangam, ir sii kala
cimi bande.

⁹ Waati kanj ir sii nda gaabi, amma war goo nda
gaabi, ir ga jaali, koyne mo ir ga ḡaaray war ma
tee boro timmanteyaj.

¹⁰ Woo maaganda se, waati kanj ay sii war do,
ay ga hayey wey hantum war se, nga ra waati
kanj ay goo war do ya si hayey šendandi war ga,
ya hin k'a tee nda hinoo kanj ir Koyoo n'a noo ya
ne. A n'ay noo hinoo woo war nafaa se, a man'a
noo hasaraw se.

KORENT BOREY BATAGA 2to 13:11xxxxiKORENT BOREY BATAGA 2to 13:13

¹¹ Aywa ag'armey, wa jaali, wa yadda ka tee boro kanj tee ka timme, wa yadda hoyray, wa tee anniya foo, alaafiya ma bara war game. Woo ra Irkoy kanj ti Bajikoyoo nda Alaafiyakoyoo goo war bande.

¹² Wa cere foo nda summuyan henanante. Irkoy boro henanantey kul ga war foo.

¹³ Ir Koyoo Isa Almasihu anneemaa, nda Irkoy bajoo, nda Hundi Henanantaa margaroo ma bara war kul bande.

Songhai de Gao

Songhay, Koyraboro Senni: Songhai de Gao (Bible)

copyright © 2019 Wycliffe Bible Translators, Inc. and BFP Velberter Mission

Language: Songhai de Gao

Contributor: BFP Velberter Mission

All rights reserved.

2020-11-18

PDF generated using Haiola and XeLaTeX on 18 Apr 2025 from source files dated 29 Jan 2022

593ebd0d-f3c5-5f89-8599-37209ac56328